

四庫全書

集部

欽定四庫全書

集部

剡源文集卷二十七

詳校官中書臣閔思毅

主事臣呂雲棟覆勘

覆校官中書臣方大川

校對官學正臣李巖

謄錄監生臣李如梓

欽定四庫全書

剡源文集卷二十七

元 戴表元 撰

古詩五言

排體

大名元復初郎中携示感遇五言八章次韻并

陳東平曹子貞編修薊丘曹克明教授

美人乘天風手吹玉參差我有龍門桐綴之冰蚕絲空
中一偈答聞者為忘機神馬已出河鳳皇且鳴岐悠悠
百年內儻有相逢時

我登海山巔羣丘眇如芥客來談九州更詰誰小大神
疲穆滿馭足璽神始載終然方寸心擾擾軀殼外流光
如急水一去難復再歸來坐虛室始覺身安泰老馬寧
為駒即且或甘帶名跡吾不嫌全生聊遠害明有不見
睫智有不衛足學靜三十年晚始悟無欲履卑懼名高
居羣忌行獨不見歌鍾家白日卧金谷不見帶索生行
吟扣哀竹為君慎燕息顧兔方在腹

東陽方韶卿惠古意七篇久不得和五月二十

六日將假館宗陽橋稍有閒暇乃為次韻
因寄訊彼中吳子善前輩子善陳文毅公
同父甥孫

長歲狎紛諠新廬稍踈靜虛名亦相累簪珮來整整青
天戍樓柳白日仙林杏散書一長謠消此清夏永

二

營營寄巢蜂白晝爭空花趺趺緣壁蟲喧飛亂如麻譬
如惡俗士便不揮鞭撻桐君何處來隔壁聞瓠巴

三

舊文空中雲零落跡易消新交江上流來去同奔潮
藹藹玄英孫望之十舍遙願爾多黍稌相投共簞瓢

四

人膽小於壺揣想無限極及其遂所願不過一消息金
華文物府前哲餘楷則千年萬年名豈使夸者得

五

作詩如挽船學力乃篙櫓向來牛耳盟諸老肯多許元

暉雲樹荒仲宣江海阻之子歸未歸相思慰風雨

六

德孤誰願高氣寒誰願清斯文鄒魯來壙坎勞其生豈
無性命憂艱難愈同情如何及門士亦作胡越聲

七

永康經濟學近古將無同甥孫世其業汗馬收全功我
欲攬遺跡雙眸冰鏡空君亦跨黃鵠吹簫白雲中

韓君美經歷賦孟夏草木長五詩示僕因寫鄙

懷通呈阮使君君美時與諸公講易

吾評陶淵明略似段干木詩文雖滿家不飽妻子腹仰
瞻清風柯俯窺白雲谷誰能為升斗辛苦受羈束因君
寄高韻千古動遐矚

以羔裘如濡洵美且侯韻為八詩送夾谷子括
赴明州推官

鑑虛磨愈明絃柔調自直臨民要儒術非但用三尺君
看春秋學從士能斷國人情豈相遠贈子以不惑

二

水耕當用牛陸行當用馬詩書無近功平世安可捨吾
州兵荒來冠蓋多苟且寧無段干木意氣能少下

送袁季源之婺州因簡范經歷

為山不願高為水不願深水深蛟龍集山高虎豹蹲我
有避人法終日衣冠林煌煌錢塘城游塵晝為陰豈無
青雲交難在相知心豈弟袁大夫寒窓理閑琴峻坂為
牛力炎天九秋襟膠漆四十年齟齬以至今天欲饑餓

我使子無黃金勸仕拙不諧驅耕弱難任低回向誰門
後生氣駸駸今晨積潦霽烏烏有好音約我共行役東
平步嶽嶽皎皎嫠女精瀾瀾雙溪潯臺有白馬生風稜
共蕭森文林惜妄動動必向所欽吾評古毛義志行近
騫參公府許辟召屈身非祿淫斯人我知舊長髯善吳
吟穴蟻夢離合風花命浮沉往者納千贄終然遺一簪
欲行又不得出門失前禽子往再拜問何由振聾喑

次韻荅朱侯招遊海山

江南春草黃江北秋鴈飛窮居念還往故物悉已非我
有青雲交山林可同歸十年學撫琴對客輒累欬豈不
願和悅調苦心易為青天無古今白日相因依向來災
災人所得一何微成者化塵埃不成翻禍機玉美受雕
鐫馬良遭絆韉所以曠達士但貴知我希請休接輿歌
且急梁鴻噫名微少士責身間免官譏寧無一日力相
尋盡嶮崎霜魚碧玉鱸水菊黃金輝君歌我按筑我舞
君攬衣此日為君歡醉遊敞船扉

題陳高士所藏冬青枝上白頭翁畫

飛高得珍叢青子飢可食不知何憂愁二鳥頭亦白道
人天機深清齋意相許賴汝不能鳴一鳴嫌殺汝

以空飛本無迹韻為五詩往扣廣微張公

存一首

智有不近名賢有不踐迹百年如飄風誰作遠行客所
要在持久以道自消息吾師豈欺我白首方學易

浴蚕沙溪水一首為上饒陳烈婦作烈婦信州

上饒人嫁同郡葉氏年二十五生子四齡而寡

丙子兵寇起能以智全其家歲饑發粟賑貧
類大丈夫慷慨知大節非徒守閨門貞行而
已有司上其事賜旌表蠲復如法

浴蚕沙溪水採桑玉山巔絲成白稜稜膠作烈婦絃烈
婦何所言絃中意纏綿一說鸞影孤二訴雛巢穿巢穿
尚可葺影孤恨終天有食不自肥衆禽仰喉咽真宰憫
其疲勞役盡弛蠲及今雛長成雛群亦蹁跹朝陽照岩
林枯槁生光妍黃蘗誰謂苦鐵石誰謂堅請君屏俗耳

聽我沙溪篇

書歎七首

王生困縲紲

泳道

劉子急徵追

正仲

舒叟挈家走幾遭

鞭與笞

東野

我無三人辱闔門但窮飢飽死世更多徒

憂何以為敢作小夫歎聊為才士悲

舒子高品藻王生怪衣冠處世那得爾饒饒真自殘劉
子最多愛逢人傾肺肝勸我學其道縮身可泥蟠胡為
亦不免念此坐長嘆

英英天上星碌碌澗中石升沉雖不同精爽或相激我
有知名交四海邯鄲壁子昂遭逢不自閔頗為談者惜
談者自不知斯人寧易得

袁弟豁達人陳兄靜默士平生少附麗頗與同憂喜過
來怪事發談笑不可擬一為脫淵魚一為墜柯蟻吁嗟
其奈何天運固如此

數友越州居無書已三年台州已無數逢人每相賢日
夜憶遠友遠者隔蠻煙風氣不擇州俗情輕目前管鮑

死何處寄酒洒其阡

結友何用多管鮑無三人讀書何用博得少全其身君
有狗名子擾擾起風塵朝逐富兒飡暮聯豪士茵歸來
反如客魚鳥亦相噴

蘇州米空熟越州人不來緩急托遠婚不如傍蒿萊蒿
萊在籬落為我障浮埃生女屬他人生男尚嬰孩從何
得饘粥作此聊自哈

觀村中禱雨三首

十里不同雲五里不同雨天公白茫茫乃爾多肺腑人
言蛟龍神象類可以取蛇虫當此時行路誰敢侮飛騰
信有術忍待號者苦咄哉神禹功浩蕩流萬古

二

昨日苗穗赤今朝洒然青頗如窮旅人百金換顏形念
爾雖微根同稟造化靈自古有枯旱人類幾千齡恐是
自生化難皆問蒼冥野草人不憐何獨不凋零

三

西村送龍歸東村請龍出西村雨綿綿東村猶出日共
稱西人良或是窮可恤誰知所雨粟盡入東村室儒生
無愛憎但喜蔬蓴實通年一飽厨猶在兔園帙

山中翫物雜言十首

時露下百草流螢此飛翻初如灰燼微忽作秋星繁念
彼生育處回光照其根君莫輕流螢流螢尚知恩

二

青橘霜露時英英秀中園問訊訊居人今歲胡不蕃云

有孤兒來手觸枝上丸嗚呼此義木痛感在吾言

三

野果散高林雀鼠食之宜設非人所殘一果不敢窺寧
由網罟防亦無神物司食道固當爾雀鼠猶有知

四

見狗須不走見蛇須拱手不走爾非偷拱手亦相厚無
欺物自信能勝誰肯負不見吳山虎郭文探其口

五

鳥有反舌者自古比讒人時氣一朝遷此舌竟不伸衆
鳥莫不然更鳴以存身如何能言士聒聒無止辰

六

犁牛有土德體厚靜綏綏豈無牝牡情不自求其雌終
朝草棧間若忘渴與飢嗟彼位兒高乃爾難自持

七

精衛勇填海鵲旦苦求明明尚可求得求填海何時成我
觀飛鳴族一一各有營但為口腹謀遂爾遺其名

八

燕是孝義鳥常棲孝義家堂簷白日煖上下靜無譁以此托軀羽禍福審不差誰云知數厯俗士義之夸

九

圃人憂孽蟲為蔬畜雞雛小雞擇虫啄大雞遂啄蔬蟲去蔬亦盡對之可欬歔昂昂高冠憤反不小雞如

十

蚯蚓食土壤蚩蚩何所為蜣蟬飲風露蛻上高高枝卑

者慕其仙飄飄安可追倘令智相及無羨亦無悲

自居剡源少遇樂歲辛巳之秋山田可擬上熟
吾貧庶幾得少安乎乃和淵明貧士七首與鄰
人歌而樂之

貧賤如故舊少壯即相依中心不敢厭但覺少光輝向
來乘時士亦有能奮飛一朝權勢歇欲退無所歸不如
行其素辛苦耐寒飢人生係天運何用發深悲

二

我居在窮巷來往無華軒辛勤衣食物出此二畝園薤
松鬱朝露桑柘浮春烟以茲亂心曲智計無他妍擇勝
不在奢興至發清言相逢樵牧徒混混誰愚賢

三

松風四山來清宵響瑤琴聽之不能寐中有怨歎音旦
起繞其樹硯何不計尋清音可敷席有酒誰與斟由來
大度士不受流俗侵浩歌相倡荅慰此雪霜心

四

中年涉事熟欲學唾面婁逡巡避少年起穢不敢酬旁
人吁已甚自喜計慮周微勞消厚疚淺辱勝深憂從知
為下安處上反無傳人生各有志勇懦從所求

五

古人重畎畝有祿不待干德成祿自至釋耒列王官不
仕亦不貧本自足饗餐後世耻躬耕號呼脫飢寒我生
千禩後念此愧在顏為農倘可飽何用出柴關

六

村郊多父老面垢頭如蓬我嘗使之言辭語不待工古
來名節士敢望彭城龔有叟謂其後更恨道不同鄙哉
詭譎者為隘不為通低頭拜野老負耒吾願從

七

去年秋事荒販糶仰鄰州健者道路間什伯成朋儔今
年漸向熟庶幾民不流書生自無田與衆同喜憂作詩
勞鄰曲有唱誰與酬亦無採詩者此職何可修

丁氏厚德堂

賤士懷永憂一物常恐枯貴者止營私智或遺妻孥肉
食從古鄙黃金使人愚我游四十年錢塘車馬區但見
挿桃李誰曾種桑榆白頭識丁子儀冠儼于于示我厚
德編嘉名在塘隅談之為踴躍喜氣生眉鬚願子富倉
庾人人飽餐舖願子多酒漿日月開樽壺行藏自有命
不謁守錢奴

排律十七韻賀阮侯得子

芳城春樹晚清海月弦初瑞出三神島光纏五馬車眼

中新驚驚膝下小璠璣錦祿看爭羨犀顱畫不如試啼
賓錯愕獻夢媪勤渠庭舞張公鶴門填孔氏魚一時官
府慶數世甲科儲聞說衣冠里高增榮戟閭民隨阮公
姓鄰禁宛溪漁東去龜浮印南遊堆遶車陰移棠蔕蔕
騎擁竹舒舒政有兒童戀謠聽父老餘攢眉詢賦額正
色署刑書暗室天如鏡心田老自畚看騎金驤裏待弄
玉蟾蜍我欲歌三賈誰能說兩徐先隨湯餅祝聊當賀
錢醵

傍家東北有山曰紹地余幸得之規以為素莊也

紹地吾所欣他時以藏我岡原見逾美松柏栽已夥雙
流交在右一几平連左憶惜初經營登高忘蹙蹙年衰
已漸怯步暫石頻坐居然契券叶偶爾龜策可心手之
勤勞軀骸庶安妥况復近芳茨時能薦蔬果雖無劉伶
鋪略慕王孫裸

謝陳君祥憲使時郡家以余充歲貢陳侯頗憐

之令無行

鸞鳳不鷺暴珪璧無鋒銛評材容一切未覺世論嚴僕
昔江東歸二紀操鉏鑿聞山但廬霍慕水惟沱潛官車
歲千兩未省謁帷幰豈無趙張倫居突不得黔新年有
吉語所在興循廉惟此沮如氓生涯嗇而纖厘營疲負
挈陸取困塗霑赫赫金鋪門風雨今無簷皎皎華裾生
塵土今無襜分臺得陳侯笑語脫烹燭仁賢所居國不
言草頑憮侯家仲舉峻何如太丘謙問侯何所為深坐

靜春簾問侯何所學淨几飄風籤儼雅蓄川公高節
齊晉瞻橫流滔天來挺身卧西崦何以贈陳侯孟光
書滿奩名曰事言補其辭清以恬豈但資裨官五經
之韜鈴從來名世士必有淵源漸侯識民著龜侯材
國梅鹽誠令以德舉遐邇詎能淹愚者理宜止客僕
守窮櫬

往時王達蓋嘗與予評陶顏二公云魯公乞米
於李大夫者李大夫光弼也而怪淵明所乞食

失其主人名氏以為恨余按淵明乞食詩云飢
來驅我去不知竟何之行行至斯里叩門拙言
辭則是淵明為飢所驅本不知為何人家而叩
之亦可憐矣然淵明家有五男子傳稱翟氏志
趣亦同能安苦節夫耕於前妻鉏於後又責子
詩雍端俱年十三或當別有庶母淵明又嘗助
其薪水大約計之不翅百指之家而當飢餓單
身竟行望屋求食不知其家何以為處乃不如

魯公闔門同飢共飽擇英賢可與者通情焉不
亦可乎余家與淵明畧相類不敢用淵明法壬
辰春有感於故人之言遂和淵明詩韻將求如
李大夫者而告之

今朝胡不樂取書一哦之飢窮古不免陶生良有辭骨
肉同天倫僮僕緣食來如何長年中萬事付酒杯脫身
得一飽激烈成謠詩不如魯侯仁借貸英雄材嗟余亦
有作欲向誰同貽

君莫誇少年一首贈余光遠

君莫誇少年與我儂者疎我亦嘗少年少年君不如談
諧今已忘猶有少年餘東南山水國早得飛長裾春園
虎丘樹夏檻玉泉魚吳妍與楚艷過眼日千車當此秋
風淒遊子易欷歔我時未更事意氣益發舒出門有佳
侶遇勝不得虛惟憂日晷短當去亦躊躇官曹人所厭
高士不肯居平生縱觀處最在客南徐姻黨四面集綵
衣攤安輿停觥待淮蟹醇甘逮僮胥道路無此願此願

勝鄉閭自從秣陵歸鬱鬱不再攄三間風雨屋僻其荒
林墟非君好事者誰能至吾廬今來建溪上逢君屢相
於行藏且勿問人世有乘除舊狂我已悔新銳君當祛
男兒不用世資身在犂鉏臨風贈君別勸君惜居諸勸
君重桑梓勸君重名譽歲晚未相忘頻寄山中書

老樹

老樹老且枯數柯枝綴之蟲來食其葉藤來纏其皮幸
然根本堅未至甚離披風霜既無損雨露猶見私如何

烏鳥輩同巢自傾危鬪擊翼似斧啄傷嘴如錐樹色歲
時減樹力日夜衰回頭試一顧但可相扶持

伯收東岡麥

伯收東岡麥仲移西塍秧四季各有役餬口走皇皇豈
不惜冠履兼嘗業縑緗憐爾衣食微及茲筋力强古來
經術士什九起耕桑窮通自天命謹勿事胥商

邀陳氏子飯歸似銅山珣老丁酉五月十五日
也

飯子山下麥羹以山上笋笋堅煩齒牙麥糲哽喉吻相
邀豈云厚竟去良不忍林園隱趣出魚稻秋事近短歌
訊而翁贈子以一哂

飢旱

旱風爍我膚飢火煎我腸春夏猶自可入秋始難當
簪珥陡頓盡衾裯纖細將奪從女奴手併入米客囊但冀
喘息延敢憂生理妨山州古磽瘠歲計仰蘇杭發地流
玉粒浮天駕牙樯如何水後郡翻糴浙東糧行路急促

促人情沸皇皇焦枯望一雨
禳禱願千方雲氣亦偃蹇
魑妖轉炎揚浮生想有屬
沈憂聊暫忘

余居之西偏有小室名嗇菴詩以識之

嗇語養氣海嗇食養脾土
嗇慮養心神嗇勞養筋膂
衰年百事祛寄息此環堵
危如突圍將鈍似滯風
賈顛仆異賒延空羸待償
補夸虛道蝨賊逞獲命斤
斧收君論癡符佩我養生
主

鄰峰

霜嚴火炬青月淡兩峰白堂堂夜行誰鄰峰販醯客販
醯事且止歸農收又薄枝擊習鞭撻鮮肥憤烹炙外雖
刑憲拘內實飢困迫鹿窮有狂奔虎斃猶恐擲如何隴
上豪坐作溝中瘠世無卓魯化名在跣躄籍感歎重徊
徨羈危轉驚赤

春日城南聞禽鳥聲喧甚為賦二十二韻

今日春氣至新禽各啁嘲豈無好唇舌入耳何恹恹
雉最多端能以巧自殺黃頭亦翾給微吭和且調無計

頗滑熟烏鴉與鷓鴣自餘不知名喧呼雜箏簫黑衣猥
雄黠畫動固非鳥均為樂其性幸此風日朝城南六七
曲荒園繞榛茅我來感物變何異在山郊惟聞黃鸝至
不聞叫交交當由戀幽谷畏寒還避囂群英蓋壤內小
大一逍遙得氣不足悅觸情遂相遼乘墉少年兒挾彈
欲見邀所規不滿掬翻令汙厨庖鷹鶻勢險薄爪長尤
善捎同群自戕擊此禍極無聊深藏務遠晦尚懼形色
招危機布平陸况乃縱輕僞悲憐復譬釋當鳴詎為妖

但懷道傍樹信美非其巢

林貴父投老謁銓有贈

天寒道路長行子難為容
况復迫衰暮視近步憧憧
干世悔古學費時慙惰農
誰知凍雪卷忽視戟髯翁
袖有排闥書談如發硎鋒
聽之不能竭浩氣生奇胸
從來庠序師專以處龍鍾
才高得教誘祿休尚遭逢
此職今不少有求豈難從
去去善自愛春禽語晴壠

陳晦父赴銓十三韻

古人取遠士得一以為豪江左貢千百選掄今始勞占
對混童廝趨蹌偕吏曹以茲寓繩準棄髓索皮毛遂乃
考卷業成文喧誦號其次嚴保舉虛牘相籠叨富儒坐
可得貧儒走湔湔有司見其然厭賤如蓬蒿誰知真儒
者百黜寧不遭陳生青紫門佐書越江皋秩滿在選中
家寒無所操虞翻顯憑易買臣進緣騷吳士例則然且
母銜名高

次韻荅鹽官傅秀才

欲有險於甯千金身陡沉爭名急飢渴對面九關深誰
知海城畔山水發清音蟾蜍泄喜愠蘆蓂閱晴陰意到
得所指不作寒鴛吟斯人定不惡我輩許同襟去去復
去去白鷗未遐心

南岩留宿分韻落字

遊歡值暄秋飲狎得嘉客嵌岩復在眼徘徊忘還郭欸
欸坐向疲喧喧笑多謔短簷近見出竇乳時聞落防閣
燎蒸薪驚虛搖鼓鐸僮僮榻露處僧馴茗頻淪竟隱諒

未能羨彼高棲雀

朱使君家諸郎將別十一韻

東南典藩材朱戶賢第一天生好兒郎玉笋森六七俱
能弄文翰那教踰戶室伯也秀英英珊瑚映初日翁仲
最似古鼎彝熊彪質叔季相和鳴笙入鐘磬出人言有
陰德我愛少權術公退亦見容老衰時自失官期忽在
眼別語常促膝江湖芥舟小歲月翎箭疾善保清明心
臨歧莫輕怵

掩篋

十客久不解一解值吾仇譬如巧蛾眉同鏡見之羞結
交恨不廣難在相綢繆掩篋謝年少所藏非所求

次和焦治中雲洞紀遊十四韻

是身虛空中如雲本無有遊行又其寄縱樂安得久嵌
岩大硯質鏡削奇鬼手棟宇起何年名稱出誰口憶昔
扳藤蔓凌空訝雞狗踈踈石生竅剡剡室懸斗乘峻開
棧梯緣明掛窓牖豈無題壁堂多逢斫畬叟賢侯章平

家雅韻王謝友驪珠百四十模寫已八九坐我南樓床
澆我北海酒人生主客意如此豈云偶風花命浮沉木
鴈天可否悠然付一噓山靈倘回首

信府同知黃侯名其讀書之室曰廣居

隘夫護藩畛得少便有餘達士心曠然清明如太虛海
岳陳鼎俎羲駕走軒車唯諾無不行尚懷豚與魚嗟茲
山城氓憎長逮其胥好語朝索茅怒攻晝攘裾侯來未
數月眉頭笑舒舒退食掃一室焚香展群書舉頭窓楹

間有榜揭廣居力行守仁義鄒公不欺余

丙午二月十五日以府檄出宿了岩

衰年慕棲息役役殊未休天明發東郭日晏泊西州豈
其千金軀為此一食謀宿麥青已鬱穉桑黃亦稠欣然
一會意所愧非吾丘悔日諒不遠誓言良未酬揮手謝
還往伊嚶自伊嚶

送官歸作

生世悔識字祝身如野農勤勞養尊老膳味日可重晨

芻熟新黍耕林有過從行吟聆松籟此樂踰歌鐘

七陽字

鴈鴈西北來亦復東南翔動物各有時吾黨謹行藏
厚
缺違嚴風密袂禦凜霜陶然茅簷下一簋生春陽

班溪

我愛班溪班班為誰好於時九秋晚霜葉紅不掃石
搖未歸雲水映欲衰草累累牛羊隊洒洒魚龍道崇丘
尚多萊殘村幾經潦故物一若斯今我胡不老過從幸

相狎聊坐暢懷抱

宿福海寺

斲岩蒼龍角汲流紫雲根
道人絕俗自然無耳喧
屋脊掛修嶺一日過千轅
此日但高卧松風有清言
聽之亦無有風定松在門
炊成我欲去獨鶴鳴朝暾

六月十三日壽陳子徽太博十首以無官一身
輕有子萬事足為韻

一無字

驕雲散飛雨隨風為有無老農終歲日望施在須臾平
生官田粟長此禮義軀置之且勿戚一飽任妻孥

二官字

青青澤中蒲九夏氣淒寒翩翩翠碧羽照影蒼溪間巢
由薄天下俗士營一官小大各有適自全良獨難

三一字

窮居無公憂私此長夏日蚊蠅如俗子正爾相妬嫉麾
驅非吾任遁避亦無術惟當俟其定靜坐萬慮一

四身字

流螢出草莽空飛亂星辰蜻蜓水蟲質一變能輕身物
情羨速化過眼異新陳嗟嗟白屋士吾方保吾真

五輕字

當暑苦炎暘日缺秋風生窮憂在衣褐霜露亦可驚徘徊
念年少歲月去已輕歲月可奈何學道恐無成

六有字

自古皆有隱陶生隱於酒炎氛四面集一窟在北牖世

人羨桃源桃源復何有惟容醉鄉徒百世得相友

七子字

永日豈無飢盜粟非所擬暍行豈無勞惡木非所止君
家碧梧軒蓮荷汎芳沚我來息涼陰嘉賓薦君子

八萬字

幽蟲聒午枕掩抑聲千萬風前以虛鳴蟋蟀最多怨我
靜乃得聞一一來自獻憧憧道傍子與爾故相遠

九事字

炎方有朱鳥
璀璨顏色異
土人目為鳳
信爾可安致
生雛固當奇
千歲會一至
紛紛鴻燕期
寂寂非我事

十足字

朝遊剡山巔
暮戲剡山足
英英丹霞洞
不受塵土辱
飛仙復何許
諸子如立鵠
酌君滄浪泉
和君紫芝曲

陳茂陽書監赴史氏塾

青天碎浮雲
飄落隨長風
當年江海心
聚散豈謂同
我髮春霰白
君顏秋樹紅
各將飛騰具
坐受窮困功
懷書

更何罪暴客歲不容數夕稍振發共語涼天中天明換
顏色囊瓢赴群童此事本下策改道無所從猶勝古俠
士僧牛市廐東

春風

春風吹愁端散漫不可收不如古溪水祇望鄉江流新
花紅燦燦舊花滿山白昔日金張門狼藉餘廢宅回頭
語春風莫向新花叢我見朱顏人多金亦成翁多金不
足惜丹砂亦無益更種明年花春風多相識

八月十五夜雨中微有月色

雨色今夜別映門白鮮鮮隄知萬古月自在最高天天
高無陰晴月亦無虧圓中間隔雲霧頃刻變態千惟當
自作樂上界豈我憐接竹風撼郭倒尊水號川狂歌眺
渺莽恐有浮槎仙

九日與兒輩遊中溪

悠悠循澗行磊磊據石坐林垂短長雲山綴丹碧顆蓼
花最無數照水嬌婀娜何知是節序風日自清晏群童

競時新藕果間蔬
蔭欣然為之醉
烏帽危不墮
此日山中懷孟翁不如我

閬風舒先生客居棠溪袁仲素家見示竹簾詩

戲作問荅二首

剡竹吾問君斑斑為誰設
一登君子堂迥與凡界絕
陂龍鱗故鮮湘娥淚猶熱
既能露文章匠手安得輟
所憐無可娛如伴枯禪滅
千金散紅裙一鏡垂白髮
定非夏侯衣高堂挂秋月

其荅

何物非可憐
聿向翁戶設
翁好詩更佳
蕭然得三絕
他家少年叢
徒爾歌舞熱
正如閱優場
未久意先輟
翁今一室老
高卧百念減
湯爐松林風
紙帳梅花雪
時時有佳客
文字送日月

古詩十五韻送胡天放西遊

名僞淳安人

有鐵莫妄鎔
鎔作俠士椎
有帛莫妄縫
縫作山人衣
君看天放翁
氣貌絕清羸
瘦落七尺身
仁義充膚肌
無家

救人窮無田恤人飢江湖三十秋白頭轉嶮崎餘情尚
洒洒不吐酸寒辭事慕古豪傑諸兒那得知或云有仙
骨深中愈難窺趨騰華佗戲偃塞梁鴻噫世態貴反覆
口語瀾翻飛夫子顧之笑百觸不發機寧當待溝壑西
山古誰悲佩君珊瑚鉤酌以玻璃卮相知豈云無去去
勿復疑

舟中望紫岩

近山如畫牆遠山如帚長我從雲中來回頭白茫茫惜

去乃爾覺常時自相忘相忘豈不佳遣此春懷傷飄洒
從何來衣巾徑微涼初疑雨風集冉冉遊塵黃無歸亦
自可信美非吾鄉登舟望東雲猶向帆端翔

次韻荅二袁

相逢何草草不念別日長別我我在山別君海茫茫慰
別有難易我老不易忘今此春雲篇來別已悲傷春雲
雖多態與世無炎涼朝出山路白暮歸海天黃人生不
免別與君非異鄉我思不如雲春雲解飛翔

感物二首

駉驥今失群亦自矜
趨騰俛仰歲時久帖然
困蚊蠅豪鯨逸其穴
天水成滄溟豈無魚
鼈交望望為所憎
物理有翕張達人同
廢興幸無怵迫憂
聊復曲吾肱

其二

魚目出泥沙空村百金珍
豫章值擁輶細細供蒸薪
論材何必多適用即能神
託交何必深寡求永相親
鮑叔拙羈魯張生窮厄陳
茫然扳援際豈意出風塵

八月十六張園翫月得一字

明河盪殘雲清海收晚日婆娑林端月為我良久出洗
杯問勞苦天女笑矜矜月行虛空中萬古無損失且可
娛今宵勿復思昨日歌情天水遙坐影入樹密噴醒有
微酒微詩或呼筆仲容歡入林懷祖嬌在膝初猶整裘
褐久乃忘冠櫛趨銷翻奕盤笑傲驚帳室寧來共喧呶
不許私暇逸蚩蚩復擾擾醉態不可一情知此月下此
樂世無匹月光本天性清瑩本其質動定極渟涵聲沈

轉蕭瑟匆忙寄醉語悟遲已難述

送鄉友林耕道往信州因寄李明通余與林李
皆遊故中書盧公威仲之門

盧公全盛時桃李何紛紛冠蓋蔽白日談笑起青雲林
翁我鄉曲同業又同門如何三十年白頭始相聞全家
作楚鬼隻影窮江源起手問曲折口澀不肯言寧非衣
食牽猶賴齒頰存嘆此皆有數吾書已云云下盡浮世
塵上通先天根事來即順受不得勞悲欣我老耕破硯

百錢混人羣聽之如飲醇油油至微醺所恨各有役東
帆復西轅平生李元禮歸為致寒暄

鹿頂山朝暉軒為東玉師賦

金雞警神開燭龍轉嚴車陰蒙欲銷散岩谷開噓呀急
然蒼蘿顛湧出紅蓮華天暉初照爍六合無藏遮而我
靈臺中善根始萌芽珍重慎消息外物如塵沙

鄰友陳養直請賦山心樓

樓乃八剎舊寓也

諸峰何盤盤四起如帷牆試問客主誰茲樓山中央面

勢既環合結構欲飛翔我來名山心一笑借繩床左手
南風絃右手北斗漿山靈亦我笑夜夢車兩箱一坐三
十秋林篁鬱相望花鳥天語默烟雲野行藏開通勿障
蔽百世敢遺忘

刈園詩為竺秀才作

越霧我人

朝從園中去暮從園中歸園中何所有雜草青離離刈
少猶未覺刈多還漸稀豈憂筐筥頻要使牛羊肥但放
刈手緩勿傷蘭與葵葵高葉難護蘭弱根易萎惟彼惡

草種刈盡轉蕃滋此理不可詰此語令人思

送陳養晦赴松陽校官

書生不用世什九隱儒官抱璞豈不佳居貧良獨難陳
子剡中秀盛年早彈冠嘗蹇丹丘雲亦窺滄海瀾仙真
願喜笑魚龍從盤桓天風一吹激却步赤松關諒子太
宇定悠然置悲歡但令懷居輩極目勞追扳

秋蟲嘆

夏蟲聲漸微秋蟲聲漸繁微物何所知時至不得間嗟

我鏡中髮亦復就凋殘
淒然襍憂患
霜風掃茅菅
反不如彼虫自得草莽間
所以達生士逃名在空山
客居雖云樂不如早知還

剡源文集卷二十七

欽定四庫全書

剡源文集卷二十八

元 戴表元 撰

古詩七言

聽琴行贈沈秀才

君不見江南琴師海與聰誰與傳者夢溪公又不見醉
翁詩中沈夫子聽水作琴琴譜起祇今人間何處無琴
師問渠端由渠未知錢塘東風萬人裏沈家還見奇男
兒沈家家住鶯湖曲夜理漁絲朝采菊菊苦難餐魚又

寒彈出歌聲寄淒獨近來携琴東海行清音應滑如流
鶯湖園日煖百花嘆彈徹滿樹春風生我不識琴識琴
理為君悲酸為君喜相逢正值酒錢空佯狂攘臂紅塵
市琵琶阮咸休羨渠相知豈須頻曳裾醉酖死久髯徐
去洗手空山修樂書

赤泥嶺行

種桑三年寒得衣養犢作牛堪挽犁生男祇解戀鄉土
五日溪船催父歸行前倉庚後杜宇去家漸近聞剡語

恨身不作田舍兒騎竹搏沙遶牆戶人生衣飯取裁足
阿奴碌碌猶類福獻書覓舉直下策年少奔馳頭已白
君不見燕山萬里客更難赤泥嶺上春風寒

建溪精舍得本字

四山脩脩風日煖白髮看花惜春晚當時裒草牧羊坡
今日池臺紅霧滿最憐幽篁手所植兒戲成業亦千本
舊遊聚散萬事拙客夢悲歡百年短荒涼處處經戰馬
寒食家家澆祭盃知地下不識醉祇合生前尋酒伴

蒼苔白石堪枕藉野鳥清溪自絃管同遊飄揚正捷步
老我摧頽甘青眼風床溽暑新候濁江樹飛雲故人遠
出城少事幸縱恣賭令爭歡君莫懶

夜寒行

昨日天寒不成醉今日天寒不成寐醉遲得酒可強歡
寐少愁多頻發喟紫竿葦炬鬧荒城役夫遙作鸛鴨鳴
擁衾高枕未云苦熟聽但覺令人驚烏孫黃鵠飛不返
遼城白骨填未滿朔風蕭蕭吹成旗居人何如去人遠

丈夫無成霜滿頰沙場萬里星河疎南牆詩翁窮據爐
北窗少年猶讀書

騎馬行荅贈吳中張子潛鄉貢

君不見天上續絃膠又不見海外切玉刀傍人錯愕心
自快痕迹過眼無秋毫吳江先生淮海客長篇大章歌
落托白袍只作東土音黑頭曾射南宮策霜清水落芙
蓉開酒酣獨上吳王臺緘書右望寄飛鳥乘風忽擬穿
蓬萊人生相逢不在早賈生太早顏生老興來亦欲向

西遊約君騎馬闔門道

自信上歸遊石門訪故人毛儀卿鎮卿兄弟作

長句贈之

丙午冬

山開未開白雲梯人行不行青麥溪五年清夢隔蟻穴
千里飛塵深馬蹄重來交遊亦笑樂但覺几杖煩提携
門閒霜葉無數積風定水禽時一啼藥草春暄夜更長
木蘭花下聽天雞

昨日行

種樹莫種垂楊枝
結交莫結輕薄兒
楊枝不耐秋風吹
薄交易結還易離
君不見昨日書來
兩相憶今日相逢
不相識不如楊柳
猶可久一度春風
一回首

招子昂飲歌

與君相逢難草草
與君相逢苦不早
人生何處小泥塗
此日飄零武林道
武林城中馬如雲
閉屋狂歌人不聞
狂歌自笑君亦笑
依然狂絕不如君
君歌豈是真狂者
青衫少日春瀟洒
至今俊筆五花紋
最惜青眸十步下

虛名何用等灰塵不如世上蓬蒿人黃金偏趨不貧室
白髮難老無愁身風雨無情亦如此淒淒但聒窮人耳
不見朱樓高到天鳳簫龍管連朝起連朝笙管可奈何
我歌且止須君歌青天白雪望不極坐見綠水生層波
我生胡為被狂惱江頭魚肥新酒好從今作樂拚醉倒
與君相逢難草草

鴈南飛

鴈南飛飛且鳴我不愛爾絕漢排雲之健翼愛爾秋來

意氣各有適江湖萬里同風聲風聲萬里秋蕭索山鄉
田荒水鄉薄不應專為稻粱來得飽自住今亦樂羣飛
嘹唳奈爾何青天茫茫無網羅誰知世有苦心者夜半
聞聲悲轉多鴈南飛勸爾飛時莫近征婦舍手觸邊衣
添淚下更莫飛近貧士屋絃絕樽空怨悽獨鴈南飛飛
且止世事驚人例如此我昔扁舟五湖水年年見爾秋
風裏如今未斷少年情一度鴈來心一驚今年鴈來明
年去明年去去江南路欲將書寄去邊人明年認作書

回處

剡氏飢

剡氏飢山前山後尋蕨其斲其得粉不滿掬皮膚皴裂
十指禿皮皴指禿不敢辭阿翁三日不供糜不如拋家
去作挽船士却得家人請官米

俞光遠父子歸馬輿兼託問訊故舊

君不見深山野馬生龍駒又不見荒林老鷹鳩作雛男
兒似種世所少俞郎三世成清儒祇今道路滿塵土大

袖已覺妨奔趨提携逐食何足羨羨子有策寧親軀
符畫行雞犬靜餐錢下歲鮭魚須机神有餘自靜重蔚
蔚老氣生眉鬚高堂百客森冠裾四座指點看明珠誰
能對此心不動歸來轉覺群兒愚峽南雲深山氣冷今
歲亦聞愁旱枯但憐四壁愈憔悴傍人解笑吾人迂書
來隔宿發夢寐便買舴艋隨僮奴山籬語喧聽桺栗晚
閣粧罷懸蜘蛛暫違相見喜定劇勝似朝夕趨庭隅因
子此去傳區區先從賢翁到吾徒劉郎癯絕今更癯香

岩老人安穩無

採藤行

君不見四明山下寒無糧九月種麥五月嘗一春辛苦
無別業日日採藤行遠岡山深無虎行不畏老少分山
若相避忽然遇藤隨意斫手觸藤花落如蛸藤多力困
一顰伸對面聞聲不見人日是將來各休息妻兒懶拂
甕中塵須臾叩門來海賈大藤換糧論斛數小藤輸市
亦值錢糴得官粳甜勝乳明朝滿意作晨炊飽飯入山

須晚歸南村種麥空早熟逐日扃門忍飢哭

杖錫虎

杖錫山中深與世絕往還從來稱是仙聖窟虎暴不得
奸其間今年山神大失職虎來山前搏人食傳聞此義
我亦怪歷問更為居者惜杖錫山中民獷健疎農耕老
稚為樵壯為獵朝朝暮暮山中行山獐野雉收當糧天
寒果熟霜狸香腰弓度壠矢挿房黃茅覆溪機半張鳥
啼犬奔風箭急機鳴未發且前立平生聞虎不識面顛

倒窮途忽相及驚呼頓迅聲漸微妻兒駭呀不即歸循
踪走至設機處但有血漬爛斑衣嗚呼哀哉乎此民良
足悲嗚呼嗟哉乎此事不足疑吾聞以毒殃物者物亦
以毒殃其身我不敢以爾為仁以餌鈎物者物亦鈎爾
以為餌我不敢以爾為智杖錫山山絕深無虎不必古
有虎不必今天生此物居山林有虎無虎視爾心但令
爾心無干戈虎居深山奈爾何

少年行贈袁養直

我昔如君初冠時見君垂角兒童嬉君今長大一如我
但少頭上班班絲誦書如流日千紙更出清言洗紈綺
明珠在側真自失挾冊茫洋吾老矣人言四十當著書
春風半負黃公壚僮奴哂笑妻子罵一字不給飢寒軀
儒學無成農已惰履窮始悔知無奈人生少年還易過
請君努力無如我

義蜂行

山翁愛蜂如愛花山蜂營蜜如營家蜂營蜜成蜂自食

翁亦藉蜜裨生涯每當山蜂採花出翁為守關司徼遮
朝朝暮暮與蜂狎頗識蜂羣分等差一蜂最大正中處
千百以次分來衙叢屯雜聚本無筭勢若有制不敢譁
東園春晴草木媚漫天蔽野飛橫斜須臾駢翼致雋永
戢戢不翅輸牛車似聞蜜成有所獻儔類不得先摩牙
重防覆衛自嚴密雖有毒螫何由加一朝大蜂出不戒
舂容靚飾脩且姱蜻蜓忽來伺其怠搏擊少墜遭蝦蟇
羣蜂倉皇迷所適謁走欲死聲呀呀求之不得久乃定

復結一聚猶如麻我來訪翁親目睹搏髀不覺長咨嗟
翁言蜂種幸蕃盛衆以義聚猶堪嘉烏衣槐安傳自古
蠻觸分據兩角蝸雖云彷彿存國族徒以紀異其辭夸
博勞舅婦恨翼短驚靈異姓爭荒遐豈如此蜂互推舉
一體同氣無疵瑕我憐翁言私誚責扶傷蚤愧隋侯蛇
况伊二毒俱下類瑣細不足勞鞭撻前尤往悔俱勿論
事會倚仗來尚賒新房才成蜂未壯舊房委棄墜泥沙

雪後况湖歌

為阮使君作

君不見明州城中日月湖
紫藍綠白如畫圖
良時樂遊古亦有何人
破雪浮官厨
金猊暖壓紅氍毹
紫貂醉拂青珊瑚
麈尾高懸前唾壺
使君霜髯雙臉朱
同時僚客總豪秀
陸池閨苑羅仙儒
名談鋒湊初不惡
安得玉人歌
縷珠似聞州民喜
公出終日繞岸狂
驪呼淫絲濁管何足道
入耳得此成真娛
城尖數峰大糗糊
山谷何路通樵蘇
年年臘前得三白
樂歲仍然多餓夫
定知新年稍安樂
風流使君江左無

山苔行

苔花如雲色如雪萬壠千溪看不絕風吹日炙自鮮明
棄在空雲誰愛悅遭逢偶入山人手縛作蓬鬆掃塵帚
髻疎髮落已蕭然時對西風一回首人間貴賤不須論
此物古來從至尊猶勝長拋霜露裏秋虫野燐愁枯根

啄木行贈淨珥上人

東園嘹嘹還剝剝有鳥晨飢啄霜木天寒蟲豸得幾何
爪觜披猖良為腹華堂蝙蝠添毛衣飛蚊淨盡何處歸

海山野鶴亦有飢飢絕不向人前飛

又坐隱辭

坐隱字出顏黃門家訓而其義非也余雖移
家崇巖居猶未定每往城南寓舍城中無所
營交遊益疎或至堅坐踰旬不出遂取二字
榜其室而作坐隱辭以儆之

快馬疾馳不如徒步多金善賈不如躬耕日食八珍不
如強飯封侯萬里不如還鄉我觀古來丈夫子何用桑

弧蓬矢射四方蘇秦生為六印役主父死願五鼎烹不
如諸葛草間談管樂陶潛醉裏傲羲皇南面之尊何如
於據梧之賤環轍之智無預於荷蓀之狂高岡峻谷久
亦變青天白日晝夜行茫茫胡為憂愁浪自苦百年齒
髮誰得長堅強不如拚闕埽跡成坐隱清齋永日一爐
香

賦意未暢復拾前韻之餘者作廣坐隱辭

我作坐隱辭客來問我坐隱方開門進客還復坐為客

歷落言其詳隱朝市我不能衝塵冒暑走遑遑隱江湖
我不能披簑戴笠操舟航隱山林山林白晝行虎狼隱
田里田里赤立無資糧窮觀六合內投隱幾無鄉是以
古來人失路多猖狂或隱伶官俠客或隱藥肆僧房或
為君平隱賣卜或稱陶朱隱行商雖能逃世網於事未
為良況我難携一身隱二親白髮垂高堂神仙拔宅古
亦有無羽不得高飛揚不然少自屈歸去隱耕桑隨傭
竭作既無一夫力買田築室又乏千金裝童奴抑掄親

友棄徃徃人厄非天殃悲來俯仰尋隱處欲親書冊依
杯觴引酒未一酌狂氣鬱律冲肝腸讀書未一卷噫嗚
感慨淚浪浪酒能觸人生憤激書能覽古知興亡非徒
不足充隱具反緣二物來自戕覆杯掩卷且默坐氣定
始覺如平常因思世上百千事是非榮辱俱可忘楊朱
墨翟悲泣雨無益伯夷叔齊浪死埋首陽不如隨緣委
運祇塊坐冥心徑徃遊黃唐不論辨不憂彈射相摧傷
不還徃不憂風露沾衣裳人生衣食分已定登途役役

空自忙不見啄木鳥終朝一飽如不償不見守著龜窮
年引息泥中藏目前伸屈君莫問此鳥孰與龜年長坐
嘆自笑客亦嘆烟缺暗室生天光

行婦怨次李編校韻

丙子台州作

赤城岩邑今窮邊路傍死者相枕眠惟餘婦女收不殺
馬上娉婷多少年蓬頭垢面誰氏子放聲獨哭哀聞天
傳聞門閤多輝赫誰家避匿山南巔蒼黃失身遭惡辱
鳥畜羊糜驅入燕平居隣牆不識面豈料萬里從征鞭

酸風吹蒿白日短天地濶遠誰當憐君不見居延塞下
明妃曲惆悵令人三過讀又不見蔡琰十八胡笳詞慚
兒千年有餘戮偷生何必婦人身男兒無成同碌碌

飛花行贈馬衢州時馬在建輿別業

山上風花山下飛花飛欲盡山翁歸歸來亦自忘行跡
但覺滿地紅依依餘花更惜隨春去溪上遊人山下路
戀家漁父斷來踪難老劉郎記前度花開花落春風前
我昔與翁同少年祇今鶴去但華表何處烏啼悲杜鵑

遊人自遊春自暮從翁問花花不語且當向花日日醉
醉倒花前學花舞

織錦廻文符堅時秦州刺史竇滔妻蘇蕙若蘭
為其夫徙流沙作

君不見秦州城中雙帶花春風吹散著流沙流沙千營
復萬轉織入綵機歌不斷歌不斷可奈何人生富貴憂
患多不如窮山饁田婦白頭不識遷移苦

石湖范至能嘗作姑惡辭以為婦怨非天下之

為婦者所願聞故作續姑惡辭以廣之

姑惡姑不惡人言姑惡人豈知為姑作婦百不辭婦在
姑尚可婦死姑方悲恐傷姑意不敢違化作異物鳴無
時姑不惡姑不惡怨姑還當被姑責但願生身復作婦
死別不如生見樂

余博士家猫相乳歌

上饒余宗鐘鼎家孫枝十世猶清華南昌博士最賢者
膝下熠熠開緋牙我行其庭值供頓食指半千聲不譁

女悅男肇況脩謹冠立童趨知等差江南族聚盛亦有
如此禮法嘻可嘉長公公退忽語我瑞猫之篇題滿車
二雌同時各生子一雌病僵如卧瓜一雌端來代其乳
顧睨懇惻呼嚶啞子衆身疲乳亦竭病母起將新乳加
天寒繡褥更枕藉日暖花磚羣戲拏我憐二猫有至性
欲脫毛尾升笄珈北平將門梁肉窟此事尚得昌黎誇
公家儒化鬱積久義感宜可馴豚豸願公盡力持閭範
彌補始終無闕瑕不見古來歌舞地祇餘猿鶴與蟲沙

贈天台潘山人 號秋崖

老潘雙眸如紺珠帶以秋陽朝露之清腴山形水態出
沒千百變經君指顧不得藏錙銖我昔少年好狂走風
餐雨沐逐逐忘朝晡至今卧遊想其處但覺雲濤烟瘴
千里行須臾匡廬春風鍾阜雲彭浪之磯大小飛來孤
秦淮震澤洞庭野我眉縹緲南接五嶺東蒼梧歸來把
鉏剡山下有時一竿釣月賀家湖籠鷹捱馬困羈束每
逢風鳴草驚動號呼聞君談診到骨髓褰衣振迅恨不

六翮生形軀尋牛卜龍古所有君家祖孫三葉傳青烏
人言河流可移山可鑿秦皇漢武已類愚公愚相留徘徊
山南山北一百里勝處忽然開酒壺問渠劉伶一童
一鍾欲何用且可從我日日醉倒黃公壚

范文正公黃素小楷昌黎伯夷頌蓋宋皇祐三
年十一月在青社所書以遺京西轉運使蘇公
舜元者也後二百四十年大興李侯戡得此本
於燕及南來守吳乃文正公鄉里即訪公子孫

以畀之范氏喜而索詩為贈

有耳不聽下里巴人有手不寫劇秦美新天生靈物寄
我體可惜穢棄同埃塵清風百世希文老一字流傳今
是寶誰知堂堂伯夷頌曾借春暉發枯槁韓子也復英
雄姿氷寒斗峻餘文辭吹噓自起北海隱膾炙聊慰西
山飢天荒地老精靈在處處江湖紅散彩青離孔氏忽
自歸今遇龔侯如有待世情愛古兼愛奇書奴滿眼非
吾師請君焚香盥手拜此帖歸洗人間兒女癡

送程敬叔教諭赴建平

爾之王父東諸侯朱門行馬高修修嚴君家學又繼美
年少鄉書推上游我生苦晚百無益猶及步趨陳太丘
飄零不死見三世爾復預此能言流風神清羸談炙轂
生理蕭條書汗牛今年別我忽遠役天馬放靶難停留
問渠何官縣博士橫山之西江東陬此邦固是吳楚會
風淳土朴衣冠稠亦聞岩谷多古迹最喜道途稀使驕
公堂講罷看山坐香鼎茶檔相勸酬熱官千騎豈不好

白日公庭愁督郵飲水茹藥善自愛歲晚相期釣滄洲
題陳貴白畬齋

海山作農農較苦累級開畬燒宿莽畬成得粟不償勞
歲晚空瓶誤飢鼠不如陳郎腹果然日日閉門耕紙田
餘糧尚許餉遠客植來時和南風篇

余既題畬齋有聞紙田之說而笑者復作長篇
學農無年尤可待學儒無成祇益餒羨君終歲作書癡
聚室磬嗷窮不悔客來問計何所出一飽自懸饘粥外

平生據案猷畝心汗簡為犁筆為耒藥芽百氏草避耨
膏澤群經泉赴澮日高洛誦烏鳥悅夜半吳吟風雨會
世間梁穀何足道開卷穰穰心欲醉旅熏辟蠹防雀鼠
更繕巾箱築倉廩古言樂歲生禮義先見儒門消鄙悖
租符且免里正索子本時容書客僧東鄰有田多牛翁
日執牙籌親細碎困糧竟作誰腹飽騎吏驚惶汗流背
此時會齋談無事我冠正與周孔對禮義適口即為味
牛心菊苗皆可膾我詩君意兩自知且勿說說語兒輩

剡箋送任叔實

剡溪春水碧鱗鱗
剡水野藤如亂雲
剡人伐藤就溪洗
匠出素箋黃土紋
大箋敷腴便竿牘
小箋輕盈日千束
我昔少年貪著纂
累筒連箱輸不足
年來棄置百事休
引腕就書如畏囚
有時得箋不自愛
杜曲蠻歌相獻酬
世人貴賤隨人好
西家棄物東家寶
退筆成山何足道
為我攻修太玄草

次韻和郭祐之雙桔堂趙母壽詩

嚴親不待高官秩一刻歡娛勝千日趙郎宦薄母八旬
自採芳甘充俎實堂前酣酣雙桔紅童兒見客笑滿容
有田得耕我亦去繡衣御史語生風

醉歌贈袁茂才

君休咕囁語我欲顛狂歌君語雖工不可多我歌顛狂
如我何君不見蘓季子腰橫六印車如水奇禍一朝生
口齒又不見朱買臣朱綬煌煌不庇身不如會稽暗啞
人南山山頭北山下亦有騎牛唱歌者行人不訶官不

問歌罷牛歸卧牛舍我歌屬君君為歌桃花醉面春風
和君歌不成春亦老虛客江城車馬道明日酒醒應絕
倒剡源溪上看芳草

題范道士來鶴亭

仙客已騎黃鶴去道人自愛白鷗閒白鷗萬里猶可狎
黃鶴已去何由還借君剛風七龍轡返此靈物三神山
天空海濶望不極回首正落樊籠間

題李伯時畫五馬圖

嗚呼良馬不世出今人但尋李侯筆五龍忽墮白雲鄉
海角孤臣看自失太平天子開明堂前驅麒麟後鸞鳳
當時此馬來萬里想見顧盼生風霜龍眼老仙亦如此
揮毫談笑群公裏官閒祿飽少塵埃霧閣雲窗天上起
風流轉眼餘山河人間荊棘何其多臨風卷圖三太息
此馬今存知奈何

孫使君飛蓬亭

江南澤國多烟水年少輕身作遊子適來衰懶畏奔馳

忽見飛蓬平地起飛蓬主人人中仙曾乘千斛凌風船
船頭畫鼓催行酒船尾紅粧歌采蓮收篙卷綸今尚樂
却悔從前風浪惡青雲裘褐一鷗身白髮山林五湖客
我來花霧紅霏霏此蓬如山何處飛但當共坐索酩酊
溪塘過雨春魚肥君不見鷓鴣夷名成滄海去富貴畏人
如脫兔又不見羊裘釣客桐江上一出張皇動星象何
如飛蓬主人亭上飲醒與客論酣即寢寢酣忽作江湖
夢風雨漂搖蓬不動

金定四庫全書
卷二十八
題峴山圖

山頭種石懸蒼雲山下急流風卷紋何年荒碑當嶺立
龜趺圭首猶鱗皴神龍驅毫鬼輸墨羊公精神荆楚色
想當意匠經營初已盡東南烟霧迹從來登覽非真遊
襄人正樂吳人愁尊前鄒湛亦不惡江山千古同悠悠
君不見征南後來人姓杜自喜作碑心更苦祇留陳迹
笑癡迷行客何曾淚如雨

看花曲

種花郎君愛花好看花兒女笑花老牆東花開鬧喧喧
馬蹄蹴醉牆西草遊人賤草只看花明日重來還可嗟
但見萋迷青覆地千紅萬紫成泥沙君不聞明妃當年
辭漢宮黃雲塞下白楊風一朝邊亭靜烽火詔書自議
麒麟功又不聞馬嵬山前玉環血歲歲春風吹不滅詞
人正賞浯溪碑千秋妖恨無人說紅顏誤人何足憐花
開花謝春風前猶勝淒涼後庭樹離歌未斷江南暮

東門行二首

時鄞城火第宅遭燬故有此作

金苑四庫
卷二十八
春風顛狂卷地起吹動江城寒劫灰江城千家丹碧窟
過眼不復餘樓臺九轉燭龍竟為爾六尺海鷗安在哉
平原無人金谷散惆悵東門歸去來

其二

松枝可餐不可久蕨萁可舂難入手書生身業值無年
翰墨千困不充口烟洲何客釣寒魚江郭誰門倚殘柳
琴臺歌管無處尋惆悵東風幾回首

江行雜書

荒城日落秋江長
穠稔野熟秋風香
青天茫茫不知處
扁舟卧入菰蒲鄉
波深浪靜魚鴨樂
遙林墮影同飛揚
平生見畫無此本
便欲默寫懸高堂
湏臾雷雨漲深墨
漁戶悉閉收牛羊
篙人軟語似憐我
扞蓬蓋頭編蒿牀
此時殘怒尚什七
瀟洒幸為清蚊蟲
無人靜覺物性出
蚯蚓草蟲歌晚涼
銅山乳竇青最遠
羞縮不似來時粧
但餘田鳥如匹練
雙雙飛點暗烟黃
山川一日幾變態
人事百年安可常
停舟起問魚酒戶
此地幾年成戰場

虹梁羽化新起廢白骨無數埋前岡惆悵令人百憂起
飲客正酣歌發狂坐中悲樂誰竟是歸來玉兔搖滄浪
吳姬曲五首

吳姬來吳船蕩漾湖花開隔堤迎笑欲飛舉不用少年
多槳催問君青春得幾許看取架上紅玫瑰

其二

吳姬歌聲宛宛歌情多當尊一闋且呼酒酒遍餘聲
無奈何春風顛狂亦如我坐見花外搖湖波

其三

吳姬舞朝看成雲暮看雨偶然欲笑一回眸錦段金錢
落如土誰家學取野鴛鴦終日癡迷弄沙浦

其四

吳姬醉濃花爛蕊春憔悴當筵賭令諱空拳忘却拈三
并數四坐中癡客儘偷看翠簾雲翹歌不墜

其五

吳姬歸潮光燭影紅輝輝中心有語不敢吐安得作月

生汝衣明朝花下更須醉放取後園鶯燕飛

達觀亭歌為建康徐氏作

天風颯爽岩曦開雲溪縈環芳樹來林棲島處眼未識
何人擇勝誅荒萊仙跡著人清辟易徐郎襟懷趙郎筆
經營須通山鬼意開鑿曾煩祖龍力高亭一區尤絕塵
滄浪捧足芙蓉雲憑危醉歌敞花氣九衢塵土何紛紛
客來問名名達觀對此心情轉蕭散想見千秋爭戰場
只把雲霞眼中換浮名絆人茲可憐飛鴉落日釣窗前

何時真脫塵纓去我自網魚君刺船

春愁曲次劉正仲韻

山翁隱居鴈蒼谷春樹年年為翁綠耕休坐樹作勞歌
山光水影相徵逐歌成無人祇自娛行人頗怪歌聲殊
循踪歷歷見井舍恐是避秦來此居花烟溟濛亂晴雨
山前倉庚後杜宇客來不喜亦不驚但道寒暄無俗語
山中今歲是何年黃旗徵樹裝樓船淺村已盡到深谷
逢人未說先淒然憂來宛轉歌不已我樹非材端後死

劉號五陵當日翁如雲如今何處悲風起山南老農亦
不憂機淺不為妻子謀日高飯飽牛背坐日晚放牛溪
上遊人生逐名被名誤十年車馬長安路長安路絕雲
霧昏歸來棄筆尋農具舊遊年少難與隨夢境一笑難
重追惟有剡源窮掌固相思望斷西天垂

正仲復有倒和春愁曲之作依次奉答

漸老之日來垂垂已去之日不可追傷春畏老兩作惡
世事嘗與愁人隨忽得君家遣愁具行歌日日春溪路

不知愁緒逐詩來更惜芳顏被春誤王孫草暗誰重遊
曲江痛哭窮叅謀燕騎琵琶渭城酒居人不覺行人愁
行人欲歸痿念起白髮逢春心未死水流花落無處尋
燕去鴻來何日已溪村此日更蕭然強笑為君呼酒船
黃雞喚日不待曉蟠桃一熟三千年草間管樂真浪語
烏雀應門蓬挂宇祇餘平世畎畝心夜半吳吟泣風雨
高人與虎能同居壯士斷蛇應不殊年高漸欲置憂患
每賴君語相調娛昔日劉郎悲放逐看花惆悵春無綠

金谷園
卷二十八
何如今日春愁曲爛醉徉狂白雲谷

題趙子昂畫馬

趙子奇才似天馬頃刻飛龍生筆下畫成撫卷復長歌
坐客喧喧不停寫蹄勢經鞭秋跌蕩鬃毛出跣風瀟灑
似嫌文繡減天真盡脫鞍韉轡輕把青袍洗足巧眉睫
馱坐奚官亦閑雅我來一見驚欲拜曾識鸞和趨廟社
千金朽骨古猶昔況此難分毛色假瑤池路斷伯樂盡
日暮嘶鳴氣暗啞為君昂首一慰意猶勝無逢老岩野

南山下行

南山高北山高行人山下聞叫號旁山死者何姓氏
纍骸骨橫林皋鳥喧犬噪沙草白酸風十里吹腥臊
中有一人稱甲族蔽膝尚著長襦袍不知嬰觸為何罪
但惜貴賤同所遭妻求抱尸諸子哭冤氣滅沒埋蓬蒿
人言損身由貨寶山村豈得皆權豪一言不訓兵在頸
性命轉眼輕鴻毛龍爭虎鬪尚未決六合一宰何所逃
振衣坐石望太白寒林夜籟聲淅淅

相逢行贈文伯純同年

昔日相逢面如雪今日相逢面如鐵人生年少得幾時
動作風塵十年別十年別久未為惡頻見亦無年少樂
寒樓夜雨金瑣夢故園春風白袍客雕鞍駿馬紛紛來
西城亂花春漸開與君追逐覺老醜一笑且醉高陽杯
相逢得醉今日好醉眼相思還易老只圖留君日日醉
醉裏忘却江南道

壽陳貴白

祝君以陸地千蹄牛君言不如扁舟江海狎浮鷗祝君
以通侯尺二組君言不如草屋三間卧風雨富貴何人
不解頤君視二物如兒戲我今贈君亦無物但有髦牙
佶偃村田詩我歌詩君進酒客主謹譁起相壽尋常此
日費千金京洛奔馳今白首江風颯颯吹黃塵對面樓
臺不見人與君漂泊為何事一笑幸是山林身寡語薄
味足以養氣少求簡出足以養體竒章鍾乳本斧斤胡
廣菊潭堪唾涕君不見南方顛顛五色龜窮年引息不

嫌饑又不見曲轅擁腫百圍木匠石捐棄反為福蝸封
蟻壤何足論歸來未廢蓬蒿園我更搜詩君釀酒通家
德公有賢婦

春溪惡寄孫常州

孫有約不至

春溪惡日日春風吹過客千車萬轍不相嫌一客歌來
吹倒却旁人借問客為誰咸淳朝士今布衣聲名欲隱
人自知君不聞孫興公逃亂走入黎洲峰子孫百世居
峰下往往翰墨餘仙風鶉衣藿食何足恥頭白河清吾

亦俟向來南面五馬車只飲西山一盃水青牛處處迷
行踪白鶴歸來餘故宮道逢樵客知去遠遲君不來三
日晚溪水猶能作吳語似續君家遂初賦

碧桃花歌為王丞作丞名子兼字達善丙子家
燬於火瓦礫中自產此桃

君不見孔家藏書屋屋壞猶聞起絲竹又不見鄭家註
書老書帶後來垂作草如今王家萬卷文字林桃花一
樹春沈沈花成不勞主人種花落更同山客吟從來春

卷二十八
花重萼不綴實此花可玩實可食我擬天公出奇物來
壽主人并餉客春前待花花下狂春後待實林下嘗定
知此桃不作尋常草木味只作舊時文字香王夫子多
釀酒春風亭館何處無天錫名花祇翁有從翁乞醉三
萬日仍令醉後花從筆間出

王丞分惠碧桃樹再賦奉謝

水星之精天上遊春風歲歲蒼龍頭偶然根葉著下土
散作人間百花樹莫疑君家此花無種生定是天上蒼

龍精白玉之趺青玉簇開花既奇成又速三年方駭大
如林五年已見高踰屋我來吟作書林花烟塵萬捲重
抽芽君家原有孝義種自來青州丞相家為君出芝草
芝草那能千日好為君結琥珀琥珀恐為貪者獲不如
此花混在春花叢歲歲與君同春風春風同賞復同吟
願與主人同好心更令此花分作千百本處處種成君
子林

贈趙子實

北風吹沙溪倒飛白日未落山中歸千邀萬覓不相就
誰信有人穿翠微幅巾大帶長襦袍韋篋錦囊鮮綵毫
名門發身合燕頤一經傳家真鳳毛坐車侯嬴吾不讓
白社寒林氣清放驂麟翳鶴誰不能要識神光牛背上
蓬萊山丹霞谷天仙留書三萬軸聞君暫去還復來許
君細和滄浪曲

積雨小霽喜袁太初舒叔恭兩生至

春山日日寒風雨一日天晴花欲舞林暄洞屋散空烟

水活溪巖落冰乳嗟余鬱鬱無所適方對青山一開戶
蒼袍紫帽兩少年健足齊扳氣如虎名區入眼疑未快
忽肯捫蘿到茲土霜蔬處處稀尚摘臘酒家家寒未煮
相看氣味太村野自喜談諧少城府舒郎十八白眉長
四海龍門有明父袁郎皎潔巧步趨出語珠圓吾所許
人言風骨須晚秀早慧詭詭天謾與吾評此論殊未公
峻詆曾經孔文舉歌成高軒已年倍賦解鳴蟬容容覩
吾山雖窮有靈跡雪瀑丹崖相媚嫵留君待作大雷吟

莫學癡兒生吳語

謝李仲賓墨行

君不見李侯筆端如渭川頃刻匹紙生琅玕霜柯雪幹
鐵石色忽作小山烟雨寒問君何處得此本湖州嫌濃
眉州軟風軒月檻一相逢妙處不與人意遠人言學畫
先學影此君風骨青雲並林深有路鳥聲真日高無人
山氣靜平生見此我不踈逢侯得畫兩有餘從今洗眼
空山底更讀人間瀟灑書

題王敬仲野亭

宣城

王家野亭蒼翠邊
秋山萬疊相鈎連
披衣曉霽伴雲坐
散髮夜涼須月眠
主人清豪亦好客
常有車蓋來翩翩
門閒無煩鶴通謁
酒散有時風埽筵
問君生涯幾何許
笑指沙漠滄洲烟
朱門千礎局嬋娟
豪絃急管爭喧妍
何曾一日能免俗
稍來對談心爽然
古人去遠吾不識
今日汨沒難為賢
長公高談少公和
魯山伯鸞相後先
名成但恐累隱趣
莫遣妙語人間傳

贈彈琴衡山蕭道士

寂寂歷歷不足聽聽久亦復難為情
名嗔勢忿大如屋袖手對此須臾平
一拊再拊玄鶴舞三四拊之淒風生
天寒歲晚行路遠湘水日夜東南傾

登新嶺

聲聲確確白石溪綿綿茫茫青草磯
四山陰雪濕灰色六月杜鵑深樹啼
田廬經漂有高下麻豆滿塢無東西
隔岩飛流送人語對面喧風吹馬啼
祇今莫辭柳栗杖

與子更上巔
屹梯登高意
遠會有極
回首烟海
令人迷

送葉伯幾赴奉化錄
杭州作

君不見東海獐
龍子學飛
便逐風雲起
又不見西域豪
馬駒墮地
一日能馳驅
葉家翁季亦
如此一經接
武成師儒毛
錐如風腹如
笥快書疾讀
三千字頗聞
曾下仲舉榻
不為頻通禰
衡刺臺書
翩翩江上來
吾州自古多
賢才裹琴携
硯速相就為
子歸埽山中
菜

歲晚次韻答李在明

墨鄉守墨不作惡歲晚左就醉鄉公何人吾伊驚夜半
大雪北窓歌國風

仇山圖 為仇近仁作

仇山山下仇山人白頭宦學走風塵問渠家在山何處
雲氣漫漫不知路詩人作事例多癡逢山且畫且題詩
不如隣翁不識詩與畫一生耕釣仇山下

剡源文集卷二十八